

RELACION

PËR

PROJEKTLIGJIN “PËR RATIFIKIMIN E PROTOKOLLIT TË GJASHTË SHITESË TË MARRËVESHJES PËR FORCËN SHUMËKOMBËSHE TË PAQES NË EVROPËN JUGLINDORE”

I. QËLLIMI I PROJEKTAKTIT DHE OBJEKTIVAT QË SYNOHEN TË ARRIHEN

Në kuadrin e marrëveshjes të Forcave Paqeruajtëse Shumëkombëshe të Evropës Juglindore {*Multinational Peacekeeping Force South Eastern Europe (MPFSEE)*}, e cila është nënshkruar në Shkup, më 26 shtator 1998, dhe katër protokolleve shtesë të saj, protokollit të parë shtesë, nënshkruar në Athinë, më 12 janar 1999, ratifikuar me ligjin nr.8544, datë 4.11.1999, protokollit të dytë shtesë, i nënshkruar në Bukuresht, më 30 nëntor 1999, ratifikuar me ligjin nr.8640, datë 13.7.2000, protokollit të tretë shtesë, i nënshkruar në Athinë, më 21 qershor 2000, ratifikuar me ligjin nr.8816, datë 20.9.2001, protokollit të katërt shtesë, i nënshkruar në Romë, më 11 dhjetor 2002, ratifikuar me ligjin nr.9037, datë 27.3.2003, dhe protokollit të pestë shtesë, të nënshkruar në Sofje, më 21 tetor 2009, ratifikuar me ligjin nr.10172, datë 29.4.2010, është hartuar dhe është përgatitur për nënshkrim protokollit i gjashtë shtesë.

Qëllimi i këtij projektligji është ratifikimi i protokollit të gjashtë shtesë të marrëveshjes për Forcën Shumëkombëshe të Paqes në Evropën Juglindore. Ky protokoll ka për synim përmirësimin e marrëveshjes bazë, pasi është gjykuar se nevojitet më shumë fleksibilitet në vendimet që merren, për sa i përket mënyrës se si funksionon Forca Shumëkombëshe e Evropës Juglindore (MPFSEE) dhe brigada e saj SEEBRIG.

Ky protokoll është miratuar, në parim, me vendimin nr.673, datë 7.11.2018, të Këshillit të Ministrave.

II. VLERËSIMI I PROJEKTAKTIT NË RAPORT ME PROGRAMIN POLITIK TË KËSHILLIT TË MINISTRAVE, ME PROGRAMIN ANALITIK TË AKTEVE DHE DOKUMENTE TË TJERA POLITIKE

Miratimi i këtij projektligji është në përputhje me politikat e Ministrisë së Mbrojtjes, në kuadër të anëtarësimit në NATO, si dhe në përputhje me programin për mbrojtjen dhe sigurinë kombëtare të qeverisë shqiptare.

Ky projektligj është parashikuar në programin e përgjithshëm analitik të projektakteve të Ministrisë së Mbrojtjes.

III. ARGUMENTIMI I PROJEKTAKTIT LIDHUR ME PËRPARËSITË, PROBLEMATIKAT, EFEKTET E PRITSHME

Nënshkrimi i protokollit të gjashtë shtesë të marrëveshjes për Forcën Shumëkombëshe të Paqes në Evropën Juglindore do të sjellë një rritje të ndërveprueshmërisë ndërmjet vendeve anëtare të Evropës Juglindore, duke sjellë një rritje të sigurisë rajonale dhe të stabilitetit.

IV. VLERËSIMI I LIGJSHMËRISË, KUSHTETUTSHMËRISË DHE HARMONIZIMI ME LEGJISLACIONIN NË FUQI VENDAS E NDËRKOMBËTAR

Nënshkrimi i këtij protokollit është në përputhje me Kushtetutën; ligjin nr.10100, datë 26.3.2009, “Për aderimin e Republikës së Shqipërisë në Traktatin e Atlantikut të Veriut”; ligjin nr.10101, datë 26.3.2009, “Për aderimin e Republikës së Shqipërisë në marrëveshjen ndërmjet palëve të Traktatit të Atlantikut të Veriut për statusin e forcave të tyre” (NATO SOFA); ligjin nr.43/2016, “Për marrëveshjet ndërkombëtare në Republikën e Shqipërisë”; ligjin nr.8544, datë 4.11.1999, “Për ratifikimin e marrëveshjes dhe protokollit shtesë për krijimin e Forcës Shumëkombëshe të Evropës Juglindore”; ligjin nr.8640, datë 13.7.2000, “Për ratifikimin e protokollit të dytë shtesë të marrëveshjes për krijimin e Forcës Shumëkombëshe të Paqes të Evropës Juglindore”; ligjin nr.8816, datë 20.9.2001, “Për ratifikimin e protokollit të tretë shtesë të marrëveshjes së Forcës Shumëkombëshe Paqeruajtëse të Evropës Juglindore”; ligjin nr.9037, datë 27.3.2003, “Për ratifikimin e protokollit të katërt shtesë të marrëveshjes për Forcat Paqeruajtëse Shumëkombëshe të Evropës Juglindore”; dhe ligjin nr.10272, datë 29.4.2010, “Për ratifikimin e protokollit të pestë shtesë të marrëveshjes për Forcën Shumëkombëshe të Paqes në Evropën Juglindore”.

V. VLERËSIMI I SHKALLËS SË PËRAFRIMIT ME ACQUIS E BASHKIMIT EVROPIAN (PËR PROJEKTAKET NORMATIVE)

Ky projektligj nuk synon përafrimin me ndonjë *acquis* të BE-së.

VI. PËRMBLEDHJE SHPJEGUESE E PËRMBAJTJES SË PROJEKTAKTIT

Forca Paqeruajtëse Shumëkombëshe e Evropës Juglindore (MPFSEE) u krijua me qëllimin për të kontribuar në sigurimin e stabilitetit rajonal dhe për të

kultivuar marrëdhënie të fqinjësisë së mirë ndërmjet vendeve të Evropës Juglindore.

Krijimi i kësaj Force, në nivelin fillestar të një brigade shumëkombëshe (SEEBRIG), u vlerësua si një mundësi e mirë përgatitjeje e personelit të Forcave të Armatosura të secilit shtet, për të qenë të gatshëm për të vepruar më pas, në kuadër të misionëve të NATO-s apo OKB-së.

Për të zyrtarizuar këtë iniciativë, në Shkup të Maqedonisë, në datën 26 shtator 1998, u nënshkrua prej ministrave të Mbrojtjes së shtatë vendeve të Evropës marrëveshja për krijimin e Forcës Shumëkombëshe të Evropës Juglindore dhe protokollit i parë shtesë i saj. Vendet nënshkruese të kësaj marrëveshjeje janë Shqipëria, Italia, Turqia, Greqia, Rumania, Bullgaria dhe Maqedonia. Marrëveshja u ratifikua nga Kuvendi i Republikës së Shqipërisë me ligjin nr.8544, datë 4.11.1999.

Natyrisht me kalimin e viteve, modernizimin e kapaciteteve, ndërveprimin në rritje me NATO-n, por edhe vendimeve që janë marrë në kuadër të iniciativës të Ministerialit të Mbrojtjes së Evropës Juglindore (SEDM *Process*), kanë ndodhur shumë ndryshime edhe në mënyrën e funksionimit dhe strukturën e MPFSEE-së. Këto ndryshime janë dashur të pasqyrohen pa dyshim në marrëveshjen bazë të krijimit të forcës dhe për këtë janë nevojitur të hartohen dhe të hyjnë në fuqi, përveç protokollit të parë, edhe katër protokolle të tjera dhe përkatësisht:

- Protokollit i dytë shtesë, i nënshkruar në Bukuresht, më 30 nëntor 1999, ratifikuar me ligjin nr.8640, datë 13.7.2000;
- Protokollit i tretë shtesë, i nënshkruar në Athinë, më 21 qershor 2000, ratifikuar me ligjin nr.8816, datë 20.09.2001;
- Protokollit i katërt shtesë, i nënshkruar në Romë, më 11 dhjetor 2002, ratifikuar me ligjin nr.9037, datë 27.3.2003;
- Protokollit i pestë shtesë, i nënshkruar në Sofje, më 21 tetor 2009, ratifikuar me ligjin nr.10172, datë 29.4.2010.

Edhe pse për shumë vite, tashmë vendet kontribuese në MPFSEE kanë një bashkëpunim mjaft të mirë, është parë i nevojshëm sërish amendimi i marrëveshjes bazë me një protokoll të gjashtë. Drafti është rezultat i bashkëpunimit të ekspertëve ligjorë të vendeve palë.

Synimi kryesor është rritja e fleksibilitetit të ndërveprimit të SEEBRIG-së me njësitë e tjera në operacione të NATO-s, BE-së dhe OKB-së, si dhe një rritja e efikasitetit të funksionimit bazë të forcës. Sigurisht, ndryshimet e marrëveshjes nuk prekin thelbin e saj, pra parimet mbi të cilat funksionon MPFSEE-ja dhe qëllimi për të cilën ajo u krijua.

VII. INSTITUCIONET DHE ORGANET QË NGARKOHEN PËR ZBATIMIN E PROJEKAKTIT

Ngarkohet Ministria e Mbrojtjes për zbatimin e protokollit të marrëveshjes që miraton ky projektligj.

VIII. PERSONAT DHE INSTITUCIONET QË KANË KONTRIBUAR NË HARTIMIN E PROJEKTAKTIT

Në hartimin e këtij projektligji kanë kontribuar strukturat dhe drejtoritë përkatëse të Ministrisë së Mbrojtjes.

IX. RAPORTI I VLERËSIMIT TË TË ARDHURAVE DHE SHPENZIMEVE BUXHETORE

Miratimi përfundimtar i marrëveshjes, i cili do të bëhet nëpërmjet ratifikimit nga Kuvendi i Republikës së Shqipërisë, nuk do të ketë asnjë efekt shtesë në buxhetin e shtetit, përveç detyrimeve të ndërmarra që në anëtarësimin fillestar në vitin 2000.

KËSHILLI I MINISTRAVE